

TE HEHEURAA API

I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

“Ua parau atura oia ia ratou: E haere outou e ati noa'e te mau fenua'toa, e a ao i te Evanelia i te taata'toa.

“O te faaroo, e ua papetito hia ra, e ora ia: area o te ore e faaroo ra, e faahapa hia ia.” Mareko 16: 15, 16.

Nu. 6.

10 Mati, 1911.

Mat. 4.

Ia Bapetizohia Anei te Taata Atoa e Tia'i ia Noaa te Ora?

Ua ani-pinepine-hia matou e te mau taata e rave rahi e, ia papetizohia anei te mau taata atoa e tia'i ia noaa te ora? E e aniraa faufaa rahi roa teie, no te mea te hinaaro nei te taata atoa ia noaa te ora. E no reira e matana na râ tatou i te imi i te parau mo'a i papaihia e na te reira e haapii mai ia tatou i te parau mau na nia iho i taua tumu parau ra. Te taio nei tatou i roto i te Evanelia i papaihia e Luka ra e, na Ioane Bapetizo i tonohia mai e te Atua ia haapii atu e i bapetizo atu hoi i te bapetizoraa tatarahapa ia matara te hara; e ua parau atura te Fatu e, o te mau taata o tei farii i taua bapetizoraa ra, faatia ia ratou i te Atua. Area te mau Pharisea e te mau haapii ture, ua patoi ia ratou i te a'o a te Atua ia ratou iho o ratou aore i bapetizohia e a'na. Luka 7: 29, 30. Eaha, e faaorahia anei te taata o tei patoi atu i te a'o a te Atua ia ratou iho? Te mana'o nei matou aita. O te bapetizo o te a'o ia a te Atua, e no reira te mau taata tei ore e bapetizohia e ore ratou e faaorahia i roto i te

basileia o te Atua, no reira te haapii atu nei matou e e bapetizohia te taata atoa e tia'i ia noaa te ora. Ua tonono atura te Fatu i ta'na melahi ia Korenelio e ua faaite atura taua melahi ra ia'na e e tii oia ia Petero e na'na e faaite mai ia'na i te mau parau e ora'i oia e to'na atoa ra mau fetii Ohipa 11: 14. Na reira atura Korenelio e ia tae maira Petero, faaue ihora oia ia ratou ia bapetizo ma te i'oa o te Fatu ra. Ohipa 10: 48. Ahiri mai te mea ua patoi atu Korenelio i te bapetizo, ua tia anei ia'na ia faaorahia? Aita roa, no te mea ua parau atura te melahi ia'na e, e faaite Petero ia'na i te ravea e ora'i oia e to'na ra mau fetii atoa hoi, e ua faaue te aposetolo ia'na, ia bapetizohia oia e to'na mau fetii e tia'i. E haapiiraa papu roa teie ia bapetizohia te taata atoa e tia'i ia noaa te ora.

Ua na ô atura Paulo i to Galatia ra e. E tamarii ana'e hoi outou na te Atua i te faaroo ia Iesu Mesia ra. O to outou atoa hoi i bapetizohia i roto i te Mesia ra ua ahu ia i ta te Mesia ra. Gal. 3: 26, 27. Mai te mea ra ia faaahuhia tatou i ta te Mesia e tia'i ia roaa te ora, i reira e bapetizohia tatou e tia'i no te mea, na roto i te bapetizo ua faaahuhia'i tatou i ta te Mesia ra. A tonono atu ai Iesu i ta'na mau aposetolo, ua na ô atura oia. E haere outou e ati noa a'e te mau fenua atoa, e faaite haere i te evanelia i te taata atoa, o te faaroo e ua bapetizohia, e ora ia; area o te ore e faaroo ra, (e no reira tei ore i bapetizohia) e faahapahia ia. Mareko 16: 15, 16. Te haapii papu mai nei te Fatu ia tatou na roto i teie nei mau parau e tei te taata faaroo e tei bapetizohia te ora. No reira te ite faahou nei tatou e, ia bapetizohia te taata atoa nei e tia'i ia noaa te ora. E e haapiiraa teie na te Mesia iho, e e tia ia vai ia patoi atu?

Ua parau atura Iesu ia Nikodemo, "Amene, amene e parau atu vau ia oe ia ore te taata ia fanau i te pape (oia hoi ia bapetizohia i te pape) e te varua (oia hoi ia bapetizohia i te varua) e ore oia e ô i te basileia o te Atua ra."

Ioane 3: 5. Mai te mea ia faaôhia tatou i roto i te basileia e tia'i ia noaa te ora, i reira, ia baptizohia te taata atoa e tia'i, no te mea na roto i te baptizoraahia o te pape e te varua ua faaineine tatou ia tatou iho ia ô i te basileia ra o te Atua.

Ua na ô atura Petero. "I te anotau no Noa i ora'i e toofanu pue taata i te moana (pape) oia hoi na taata too vau ra. E o tei au i te reira ra, o te baptizo ia, e ora'i tatou atoa i teie nei." A taio Petero I. 3: 20, 21. Papu roa teie haapiiraa na Petero. Ia baptizohia te taata atoa e tia'i ia noaa te ora. I te mahana Penetekose a faaroo ai te mau taata e rave rahi e, o Iesu o te Mesia ia, e ua ani maira ratou ia Petero ma, eaha te mea e au ai ia ratou i te rave. Pahono atura Petero ia ratou. "E tatarahapa, e ia baptizohia outou atoa i roto i te io'a o Iesu Mesia ia matara te hara, e horoahia mai ia te Varua Maitai ia outou." Ohipa 2: 38. Ua faauehia ratou e Petero ia baptizohia e tia'i, no te mea, e ore te ora e noaa ia ratou ia ore ratou ia na reirahia'i. Ua haapii atura Ioane Baptizo i te baptizo tatarahapa ia matara te hara a parahi ai oia i roto i te medebara. Mar. 1: 4. E ua na reira atoa oia na te mau vahi atoa i te pae i Ioridana ra. Luke 3: 3. Ua faaue atura Petero i te mau taata ia baptizohia ia matara ta ratou mau hara. Ohipa 2: 38.

Ua na ô atura Anania ia Paulo. "E teie nei, eaha oe i haamaoro ai? A tia, ia baptizohia oe, e horoi ê atu i ta oe mau hara." Ohipa 22: 16. Na roto i teie nei mau irava parau i haapiihia mai e te mau tavini i maiti-mau-hia e te Atua, ua ite tatou e, ia matara ta tatou mau hara e tia'i ia noaa te ora. E te haapii mai nei ratou ia tatou aita e ravea ia matara'i te mau hara maori râ na roto i te baptizoraa. Ua haapii atura Iesu: "E ore te feia e parau mai ia'u ra e, E te Fatu, e te Fatu, e hope paatoa i te tae i te basileia ra o te Atua." Aita e tia i te hoê taata o tei faaroo mau i te

mau parau i papaihia i roto i te bibilia ia parau e, e faaorahia te taata tei ore i baptizohia. Ei reira te mau taata o tei parau e, e te Fatu, e te Fatu, e o te patoi atu i te baptizo, e noaa ia ratou teie nei faahaparaa: "Aita roa vau i te ia outou. E haere ê atu outou, e te feia rave parau ino." Mat. 7: 23. Ahiri aita e faufaa te baptizo, eaha te mea i faaue mai ai te Mesia ia baptizohia'i tatou? E ture tumu te baptizo no te evanelia nei. A hi'o Hebera 6: 1, 2. Ua ani mai the hoê taata ia Iesu na ô maira. "Eaha ta'u ohipa maitai e rave e roaa'i te ora mure ore ia'u?" Ua na ô atura Iesu. "Te hinaaro na oe ia noaa te reira ora, a haapao i te mau ture ra. Mat. 19: 16, 17. Aita roa te Atua i hinaaro ia pohe atu te hoê taata ia noaa paatoa râ te ora mure ore. No reira ua tuuhia mai e a'na te mau ture, ia haapaohia e te mau taata e tia'i e o te baptizo te hoê o te mau ture ta'na i tuu mai. E ua na ô atura Iesu ia haapao i te mau ture e noaa te ora mure ore. E homa e, na roto i te mau parau i papaihia i nia'e nei, ua ite maitai tatou e e baptizohia te taata atoa e tia'i ia noaa te ora. E te mau taata o te hinaaro ia faaorahia i roto i te basileia o te Atua. Ia faa-ineine ratou ia ratou iho e tia'i, na roto i te faaroo ia Iesu Mesia, e te tatarahapa i ta ratou ihora mau hara, e ia baptizohia e te mau tavini tei haamana-mau-hia e te Atua. E i muri iho i te reira e tamau maite i te faaroo, e te haapao hoi, i te mau ture e tae noa'tū i te hopea o to ratou ora nei. E o te na reira, te vai ra te mahana o te Fatu, ei reira oia e parau a'e ai i te feia ua haapao i te mau ture, "A haere mai outou e te feia i faaorahia e tau metua, e parahi i te basileia i haapaohia no outou mai te hamaniraa mai o te fenua nei ra."—VILIAMU SETEMILA.

—♦♦♦—
 "E teie nei, ua tanuhia tatou e oia atoa, i te baptizo-raahia i roto i to'na ra pohe; mai te Mesia i faatiahia e te mana o te Metua i te poheraa ra, ia haapao atoa tatou i te haerea e au i te ora apî." Roma 6: 4.

Te Parau Tuatapapa no
Iosepha Semita.

(TUATIRAA.)

PENE VI.

MATAHITI 1827-1828.

Tupu ihora te hamani ino rahi ia Iosepha. Ua tae mai o Maratini Hareti (Martin Harris) e ua tauturu ia'na. Ua faatupuhia te parau tohu e Tehare Atone (Charles Anthon). Ua riro Maratini Hareti ei papai parau na Iosepha.

TE reira tau matahiti tupu ihora te hamani ino rahi ia Iosepha. Ua amuihia te mau taata iino e rave rahi, e te tamata noa ra ratou i te eiâ i te mau api auro mo'a, teie râ te tia i noa ra Iosepha ia ratou mai te tauturuhia mai ia e te Atua. Riro'tura te mau orometua no te mau haapaoraa ê ê, ei na mua i te haaparareraa'tu i te parau haavare e i te faatupuraa i te feii e te riri rahi i te peropheta apî. Aore oia i hamani ino noa'tu i te hoê o ratou e te taata atoa ra. Area râ ua parau atu oia mai te mātā'u ore, ua parau mai te Atua ia'na; atira noa'tu ia ririhia oia e to te ao atoa nei i te reira, no te mea e parau mau. Ua faauehia oia e Moroni ia iriti te papaa parau, teie râ te tamata noa ra te mau enemi ia roaa te mau api auro, no reira ua huna Iosepha i te mau api ia ore ia riro ia ratou. Ua vavahi ratou i te fare, e ua imi haere na roto i te mau piha, e i raro a'e i te tahua fare, e i roto i te piha i nia'e i te tahua fare; peneiae i iteahia e ratou; area na mua to ratou taeraa mai ua afai-ê-hia ratou e Iosepha, e no reira aita i manuia to ratou mau opuaraa iino. Area râ ua haapeapea-noa-hia oia e ratou, ia ore e tia'i ia'na ia rave ta'na ohipa iritiraa, e i muri a'e ua mana'o a'era oia e e mea maitai ia faarue oia i te oire ra o Manesera (Manchester) e haere ê atu i te tufaa fenua rahi

ra o Penesalavenia i te fare o to'na metua hoovai parahi ai, peneiae ua tia ia'na ia rave i te ohipa i reira mai te peapea ore. Te faaineine ra oia no to'na tere, teie, râ ua veve roa oia, aita ta'na e moni e tae atu ai i te vahi ta'na i hinaaro ra, e aita ta'na e ravea e haere atu ai maori râ ia tauturuhia mai ia oia. E inaha hoi ua tae mai Maratini Hareti e ua horoa noa oia i te moni e pae ahuru dara ei tauturu ia Iosepha i ta'na haereraa. No reira ua tae Iosepha i te vahi i mana'ohia ra. I to'na haereraa e piti a'na auau-raa-hia e te mau enemî eiâ haru e ua imi maite ratou i te mau api auro, area râ ua huna ê na Iosepha ia ratou i roto i te hoê baero pipi e aore i iteahia e te mau taata haru, e no reira aita i manuia ta ratou opuaraa ino. I te avae Ditema i te matahiti 1827 ua tae Iosepha i te fare o to'na metua hoovai, e ua rave oia i te ohipa i na avae e piti, papairaa parau huru ê tei ootihia i nia iho i te mau api auro. No te ravea a te Urima e te Tumima ua iritihia te tahi mau parau e a'na. I te avae Febuare i te matahiti 1828, ua tae mai Maratini Hareti e ua horoa'tu Iosepha ia'na i te mau parau i papaihia e a'na. Ua afaihia'tu te mau papairaa parau huru ê e Maratini, tei iritihia, i te taata ra o Tehare Atone, e taata paari e te ite hoi e ua tui to'na roo no ta'na ite i te taioraa i te mau huru parau ê ê.

E ua faaite mai taua taata ra ei iritiraa tia te reira o tei hau a'e te iritiraa i te tano i te mau iritiraa i iteahia e a'na. E i reira ua faaite atu Maratini ia'na i te tahi mau papairaa ê ê tei ore i oti i te iritihia. E ua parau mai oia e e papairaa Aiphiti i anoihia i te tahi atu â mau reo ê ê, e ua faaite mai oia e e mau papairaa parau ê ê parau mau. E i reira ua papai, e ua horoa'tu oia ia Maratini i te tahi parau faatia, e mau parau ê ê parau mau e ua tano roa te iritiraa. Ua tuu Maratini i te reira parau i roto i to'na pute ahu, haere ê atura. E i muri iti a'e ua pii atura Miti Atone ia'na a hoi mai e ua na reira oia. E i reira ua ani atu oia ia Maratini,

o vai ra tei faaite atu i taua taata apî ra i te vairaa o taua mau api auro ra? Ua na ô atura Maratini ia'na ua faaitehia oia e te hoê melahi a te Atua ra. E i reira ta'na parauraa'tu ia Maratini, "a faahoi mai ia'u taua parau faatia ra." Ua faahoi'tu Maratini te reira ia'na. A rave a'era haehae roa ihora oia i te reira, e ua na ô maira ua ore te taeraa mai o te melahi i te taata nei, e ua parau maira e afai mai te mau api auro ia'na e na'na ia ei iriti ia ratou. Ei reira to Maratini faaiteraa'tu ia'na e, ua piahia te tahi vaehaa, no reira e ore e tia ia afai atu ia'na. Ua parau mai oia, "aita e tia ia'na ia taio tei piahia." A hi'o Isaia 29: 11-15. E i muri a'era haere atura Maratini i te tahi atu â taata paari i te taioraa parau êê. O Samuela L. Mitehela (Dr. Samuel L. Mitchell) to'na i'oa ia ite atoa oia i taua mau papairaa parau êê. E ua faatia mai oia i te mau parau i parauhia e Tehare Atone ei parau mau. Ua hoi mai Maratini mai to'na haereraa'tu i na taata paari e ua faaite mai oia ia Iosepha i te mau parau i parauhia e raua. E i reira ua riro oia ei papai parau na Iosepha. Mai teie te huru o to raua raveraa i te ohipa iritiraa parau. Ua haamauhia te tahi paruru i ropu i te piha ta raua e parahi ra. E te parahi ra Iosepha i te tahi pae, e te parahi ra Maratini i te tahi pae. Te vainoa ra te mau api auro i pihaiho ia Iosepha. E mau mea mo'a roa, aita e tia ia hi'ohia e te hoê maori râ tei maitihia e te Atua, te tumu mau ra te reira i haamauhia'i te paruru. Ua rave Iosepha i te Urima e te Tumima o te tahi mea te reira mai te titea mata nei i te huru i mua i ta'na mata e ua taio maite oia i te papairaa huru ê tei ootihia i nia i te mau api auro, i te reo Beritani. E ua papai Maratini te mau parau tei taiohia e Iosepha.

—VILIAMU SETEMILA.

(E tuatihia mai teie parau.)


Te Ora Mure Ore.

E HOA ino ma e, e rave rahi roa tei mana'o e, e ore e noaa te ora mure ore i te feia hara, e noaa râ te reira i te feia parau-tia ana'e ra. Te faaite atu nei au ia outou e te mau hoa no Te Heheuraa Apî e, eiaha na outou e rû i te parau i te reira, a feruri maite na ia i te reira. Teie, o te pohe nei, e ere anei ia e, o te taa-ê-raa ia o te tino e te varua? E, oia mau ia. E vai noa anei ia mai te reira te huru e amuri noa'tu? Aita, aita roa'tu, e noaa râ ia ratou te tia-faahou-raa. Eaha ia te tia-faahou-raa? O te tia-faahou-raa nei, o te apiti-faahou-raa ia o te tino e te varua, a ora faahou mai ai, mai tei mutaiho ra. Eaha ia to te taata nei ora ia tae i te reira taime, e ere anei te oraraa mure ore? E, e oraraa mure ore ia. O te feia faaroo ana'e anei te farii i te reira ora? Aita, te feia faaroo e te feia hara, e te mau Etene atoa. Eaha'tura ia te maa vahi iti i huru ê ai te feia parau-tia e te feia hara? Teie ia, e noaa te oraraa mure ore i te feia parau-tia, i roto i te oaoaraa mure ore, i te vahi i haapaohia e te Atua no ratou. Area te feia hara ra, e noaa'toa ia ia ratou te oraraa mure ore i roto râ i te mauui-raa mure ore i te vahi i haapaohia e te Atua no ratou.

O na vahi iti noa iho ia i huru ê, ahiri mai te peu e, ia hurihia te feia hara i roto i te auahi ra, mure atura to ratou ora. Mea iti au roa e ia na'u. Eita'tura e ite a'e i te mau mauui otia ore ta te Mana Hope e tuu mai i nia iho ia ratou.

No reira, a feruri maite mai outou i te reira, e a farii mai. Te faaite faahou atu nei au ia outou e, aita'tu e noaa-raa ora, maori ra, ei roto i te Ekalesia a Iesu Mesia te Feia Mo'a i te Mau Mahana Hopea Nei.—T. a Maire.

“Mai te taata i hope i te pohe ia Adamu; e hope atoa i te faaorahia i te Mesia.” Korinetia I. 15: 22.



TEIE TE HOHO'A O ROTO I TE PARE PURERAA RAHI MENEMENE, NO TE EKALESIA A IESU MESIA I TE
FEIE MO'A I TE MAU MAHANA HOPEA NEI I TE OIRE ROTO MITI I AMERIKA.

Te Mau Parau Api.

TEI Takaroa to matou amuiraa i te Eperera i mua nei. Na te mau amaa ekalesia e haapao i te reira e tia'i.

I te 19 no Febuare i mairi a'enei. I te hora hoê i te ahiahi. Ua reva'tura te pahi auahi Niu Zilani o Aoragi, e ua mau omua o te pahi i te taura o te tira o Orohena e ua fati roa te tira mua, e te tira i muri, e te pumu, aita râ te pahi i ino maori râ te reira mau mea ana'e.

Ua aueue te tahi pae fenua i Rusia i Europa i te avae Tenuare i mairi a'enei. E e rave rahi te mau fare ua pau, e te mau taata hoi ua pohe roa i roto i taua aueueraa fenua ra. E e rave rahi te mau taata ua mairihia e te mau fare, e no reira aita i iteahia te rahiraa o te taata tei pohe roa. Ua amahamaha te fenua, e e rave rahi te mau taata e te mau huru fare atoa ua topa, i raro i roto i te mau vahi haamamaraa fenua, moe roa'tura, no reira, e mea papu ore te rahiraa o tei pohe roa i roto i taua ati riaria ra.

Ua pohe roa to matou taeae orometua o John Kirkman i te fenua ra o Hawaii i te 10 no Tenuare i mairi a'enei. Te parahi ra oia i nia i te hoê niuru, e te faahoro ra oia i taua puaa ra na te tahi e'a ino na nia i te tahi mou'a mato i pihaiho te miti. E inaha hoi i te haereraa ua turori te avae o taua niuru ra, mairi i hora raua apipiti atoa mai nia roa mai i raro i roto i te miti. E no te puai o te opape ua panu raua i tua, pohe roa i hora. I na mahana e pae i muri a'e ua iteahia to'na tino, e ua tanuhia oia i te oire ra o Kipehihu i Hawaii. No te oire Roto Miti oia. E i te 3 no Tiunu, 1910, ua haere atura oia i taua fenua ra. E taata itoitaitahi i te ohipa a te Fatu. Ua tae oia i te 25 o to'na matahiti. Ua tupu to matou aroha rahi i taua poheraa riaria no'na ra.

Ua pohe roa i te oire ra o Niu Ioka i te avae Tenuare i mairi a'enei te hoê taata o Ioane Mihela te i'oa. Ua eiâ taua taata ra i te tahi mau tapea rima, e ua tuu ratou ia'na i roto i te fare tapearaa. Hou oia ia tapeahia'i ua ani atu oia i ta'na mau hoa e horoa mai te avaava e faanavai roa ia'na i to'na tapearaa. No te mea e taata pupuhi avaava oia. Eita râ ratou i haapao noa'tu i tei anihia e a'na. E no reira ua ere oia i te avaava i na mahana e piti. Inaha hoi roohia i hora oia, i te ma'i, pohe roa i hora. I parauhia te tumu i pohe ai oia, oia hoi ua faaerehia i te avaava ia'na. E parau mau ta te Atua i te na ôraa e, "E ere te avaava i to te tino e ere i to te opu, e ere te mea maitai na te taata," Area râ teie ta'na ohipa tumu i rave, oia hoi ei faataero i te tino taâta nei, ei haapoiri to'na mana'o e ei haapau ta'na moni. E au mau hoa e, eiaha e vare i te mea faufaa ore.

Ua tarîhia na taata hoê ahuru ma piti. Teie ta ratou hara i rave na, maori râ, ua patoi ratou i te ture fenua, e ua tamata ihora ratou i te taparahi i te emepera e te tahi atu â mau taata mana no te hau i te fenua ra Iapone.

Ua tae mai i te 23 no Febuare to matou nei na taeae o Henere raua o Zataria no te mau fenua Raiatea ma. Ua farii-maitai-hia raua e te feia i reira. Ua manuïa roa te man ohipa i ravehia e raua. Ua mauruuru roa i to raua parahiraa i reira. E ua na ô maira e mau feia maitatai e te aroha hoi, tei parahi i te mau fenua Raiatea ma.

I parauhia, i te matahiti mairi a'enei, i te fenua ra o Alaka i Amerika apatoerau, ua pau te tahi mau papaa i te mau luko taehae. Ua faaitehia mai taua parau apî e te tahi taata no reira mai. Ua na o maira oia, ua pau te mau puaa ria te tahi mau puaa te reira e huru au i te puaniho, i te amuhia e te mau luko taehae i reira. E i muri a'e no te poia rahi o te mau luko taehae e te ravea ore ia noaa ta ratou maa ua pau te tahi mau papaa e ua amuhia e taua mau luko taehae ra.

Te ora nei i te oire rahi ra o Niu Ioka i Amerika te fatu auri o Anederea Canete (Andrew Carnegie). E taata faufaa rahi roa oia e e taata horoa noa. I te 28 no Tenuare i te matahiti 1902, ua faatia oia i te tahi haapiiraa rahi i parauhia Carnegie Institution, tei te oire faatere hau o Washington i te United States no Amerika. E mai te faatia-raa-hia o taua haapiiraa ra e tae roa mai i te 20 no Tenuare i mairi a'enei ua horoa oia te moni 25,000,000 dara ei tauturu i taua haapiiraa. Ua faatiahia e taua haapiiraa hoê hi'o rahi fetia i nia i te hoê mou'a teitei i Tarafonia. Ua iteahia e te hoê orometua paari hi'o fetia, no nia i taua mou'a ra na ao apî 60,000 i ore i itea-ê-hia na i te mau tau i mairi a'enei. E ua tupu to Anederea mauruuru i te rahiraa i te reira.

Te parahi nei te tahi taata tui roo faatere pahi reva o Glen H. Curtiss te i'oa i te fenua Amerika. Ua hamani oia te tahi pahi reva, e ua hamanihia i raro a'e i taua pahi reva ra, te tahi boti, e no reira ua tia taua pahi reva ra ia tau noa i nia i te miti. I te 26 no Tenuare i te oire San Diego, i Tarafonia, te hoê oire i tahatai, ua faatere oia ta'na pahi reva na roto i te reva i nia'e i te miti, e i muri iho ua faatere oia te pahi mai nia roa i te reva, e ua tau noa i nia i te miti. Aita i ino, aita hoi i tomo. A faaea noa'i te boti i nia i te miti, ua faatere-faahou-hia te reira e a'na e maha ahuru maile i te hora hoê na nia ia i te miti, no te mea e machine faatere puai tei roto i taua boti nainai ra i raro a'e i te pahi reva. E maha atura hoi ta'na faatauraa i te pahi reva i nia i te miti i taua mahana ra. E ua tupu te maere o te mau taata i te hi'oraa'tu i te reira, no te mea o oia te taata matamua ua faatau te tahi pahi reva i nia i te miti.

I te 2 no Febuare ua auene te fenua ra o Philippines te tahi fenua aihu'araau no Amerika, e i muri a'e i te reira ua roohia te oire ra o Manila te oire rahi no taua fenua ra i te pau rahi miti, e ua pohe roa na taata 600. E ati riaria rahi, area ua papaihia e tupu te reira huru ati i te anotau hopea nei e tia'i.

I te avae Tenuare i mairi a'enei, ua ama te hoê mou'a i te fenua Philippines e ua pau te tahi mau oire rii ia'na. I parauhia ua tapoihia taua mau oire rii i te rehu auahi, e te mau ofai atoa i faatarapapehia, e ua tahe te reira i te 15 avae i te hohonu. I parauhia ua pohe roa na taata 400 i roto i taua ati ra.

Ua roohia te fenua râ o Paniola i Europa i te 2 no Febuare mairi a'enei i te tahi vero iti rahi. Ua haaparari-roa-hia e piti ahuru e tiahapa pahi ravaai e taua vero ra. E e rave rahi te mau taata ua pohe roa. Ia ore te vero ra ua iteahia na tino taata pohe 25. E mau mataro ratou tei pohe no nia mai ia i te mau pahi rii i parari, e ua panu noa taua mau tino pohe i tahatai, mau ihora i reira, e ua iteahia e te mau taata imi tino pohe. E i taua mahana iho â ua huri te tahi pereoo auahi i taua fenua ra, parari ihora te pereoo e ua pohe roa na taata ratere e toru ahuru.

I te 18 no Febuare ua tapae mai i Papeete nei te pahi auahi Niu Zilani Aoragi. E tei nia iho ia'na na orometua tooiva e hoê tuahine hoi no matou. Ua hope to ratou taime haapiiraa evanelia i Niu Zilani e te hoi atura ratou i te vahi no reira mai. Ua tae mai ratou ia matou nei e ua farerei matou na roto i te farereiraa taeae e te aroha rahi. Ua mahanahana roa matou i te faarooraa i te ohipa i ravehia e ratou i Niu Zilani. E mea ruperupe e te tupu rahi te ekalesia i reira. Teie te rahi a te ekalesia i reira, oia hoi 5000 taata maohi, e 500 taata papaa. E te tupu noa nei â, aita e mahana i tuua. Ua mataitai ratou te oire Papeete nei. Ua haapao-hia e matou i te hoê pureraa i te hora 11 i te avatea. Ua a'o to matou taeae o John Latimer i te evanelia i te reo Beritani. E i oti a'e ta'na a'oraa, ua faaite mai Viliamu i roto i te reo Tahiti te mau parau i parauhia e a'na. E pureraa oaoa e te popou rahi hoi te reira. Hora hoê i te ahiahi reva-atura ratou ma te mauruuru e te oaoa rahi.

Toae a Maire, Faaau Parau,

Rue Dumont d'Urville, Orovini, Papeete, Tahiti.

W. A. Seegmiller, Imprimeur,

Rue Bréa et de la rue Dumont d'Urville, Papeete, Tahiti.